

ՏԱՐՈՆԻ ՔԱՂԱՔԱԿԱՆ ԴՐՈՒԹՅՈՒՆԸ VIII ԴԱՐՈՒՄ

Գ. Ս. ԳՐԻԳՈՐՅԱՆ

Տարոն գավառը նշանակալից դեր է խաղացել հայ ժողովրդի քաղաքական, անտեսական և հոգևոր կյանքում: Ուսումնասիրվող ժամանակաշրջանում Տարոնի պատմության կարևորությունը պայմանավորված է VIII դ. երկրորդ կեսին նրա համար հայկական երկու խոշոր ավատական տներին՝ Մամիկոնյանների և Բագրատունիների մղած պայքարով:

Մ. Խորենացու վկայությամբ, Տարոնը դեռևս վաղ անցյալում բաժանված էր երկու մասի. նրա մի մասին՝ Ողական ամրոցով, տիրում էր Սլկունյաց նախարարական տոհմը, մյուս մասին՝ Աշտիշատ կենտրոնով, Վահեունիների քրմական տունը¹: IV դ. սկզբին, երբ Հայաստանում քրիստոնեությունն ընդունվեց որպես պետական պաշտոնական կրոն, Վահեունիների տիրույթն անցավ Գրիգոր Լուսավորչին և դարձավ կաթողիկոսական տան սեփականություն², իսկ Սլկունիների կալվածքները տրվեցին Մամիկոնյաններին՝ Արշակունիների թագավորության մեջ նրանց կողմից զինված ուժերի գլխավոր հրամանատարի՝ սպարապետի գործակալությունն ստանձնելու փոխարեն³: Հողատիրության այս ձևը, թեև սկզբնական ժամանակաշրջանում պայմանական, ձեռնարկ էր, սակայն հետագայում թագավորական իշխանության թուլացման հետևանքով դարձավ ժառանգական⁴: Տարոնի մյուս մասն Աշտիշատով Մամիկոնյանները ժառանգեցին V դ. երեսնական թվականներին, երբ Սահակ կաթողիկոսն այն կտակեց իր դստերը՝ Սահականույշին, որն ամուսնացել էր Համազասպ Մամիկոնյանի հետ⁵: Հայոց կաթողիկոսը ստիպված էր այդ քայլին դիմել, քանի որ նշված ժամանակաշրջանում Հայաստանում կուսակրոնության զարգացման հետևանքով վերանում էր եկեղեցու պետի պաշտոնին ժառանգաբար տիրելու նախկին կարգը, որով միաժամանակ սպառնալիք էր ստեղծվում կաթողիկոսի հողային սեփականության գոյությանը⁶: Այս կտա-

¹ «Մ ո վ ս ի ս ի Խ ո Ր Ե Ն Ա Յ Ե Ղ: Պատմութիւն Հայոց», Տփղիս, 1913, էջ 228, 122, հմմտ. Н. Адонц, Армения в эпоху Юстиниана, СПб., 1908, стр. 309.

² «Փ ա լ ս տ ո ս ի Բ ու Ղ ա ն դ ա Յ Ե Ղ: Պատմութիւն Հայոց», Վենետիկ, 1889, էջ 117, հմմտ. Н. Адонц, նշվ. աշխ., էջ 309.

³ Մ. Խորենացի, էջ 229: Մամիկոնյանների հայրենական կալվածքը Տայքն էր (Փ. Բուդանդ, էջ 67, 132):

⁴ Ս. Երեմյան, Պայմանական հողատիրության առաջացման հարցի շուրջը ֆեոդալականացող Հայաստանում «Ձեռնական իշխանությունը» հին Հայաստանում («Պատմա-քաղաքական հանդես», 1971, № 1, էջ 3—8):

⁵ «Ղ ա Ղ ա ր ա յ Փ ա ր ա Յ Ե Ղ: Պատմութիւն Հայոց և Թուրք առ Վահան Մամիկոնեան», Տփղիս, 1904, էջ 37.

⁶ Ս. Երեմյան, նշվ. աշխ., էջ 27:

կով Մամիկոնյանները պետք է տիրություններ ձեռք բերած լինեին նաև Բագրևանդում⁷։

Հովհան Մամիկոնյանի վկայությամբ, VI դ. վերջերին Մուշեղ Մամիկոնյանն էր «դռնին Մշոյ և խոթայ, Տարօնոյ իշխանն և Սասնոյ»⁸։ Հիշյալ հաղորդումը հավանաբար չափազանցություն չէ, քանի որ կան այլ տվյալներ, որոնք նույնպես հաստատում են, որ Մամիկոնյանների տիրությունների սահմաններն ընդարձակվելով՝ Տարոնից տարածվել են հարևան շրջանների վրա։ Այսպես, 655 թ. Թեոդորոս Ռշտունու մահվանից հետո, նրա փեսան՝ Համազասպ Մամիկոնյանը ոչ միայն ստացավ հայոց իշխանի պաշտոնը, այլև, ըստ երեվույթին, նաև տիրեց Բղնունիքին⁹, քանի որ այնտեղ գտնվող Ձորապահակ լեռնանցքը (Տալոյ բերան) ուներ ռազմա-ստրատեգիական կարևոր նշանակություն. նրանով էր ամենակարճ ուղիով Միջագետքը կապվում Հայաստանի միջնաշխարհի հետ¹⁰, Գրիգոր Մամիկոնյանի իշխանության ժամանակ (661—685) Մամիկոնյանները տիրություններ ձեռք բերեցին Արագածոտն գավառում՝ այնտեղ կառուցելով Աբուճի եկեղեցին¹¹։

Այս ամենի շնորհիվ Մամիկոնյանները դարձան ընդարձակ հողատարածությունների սեփականատերեր։ Ավատատիրական հասարակական-տնտեսական կարգում հողի՝ որպես արտադրության հիմնական միջոցի, ունեցած կարևորությունն իր հերթին պայմանավորեց երկրի քաղաքական կյանքում նրանց առաջնակարգ դերը։

VIII դ. երկրորդ կեսին Հայաստանում արաբական տիրապետությունը նշանավորվեց հարկային լծի առավել ծանրացումով, երկրի ռազմական և տնտեսական ուժերի քայքայումով, ժողովրդական բոլոր խավերի, այդ թվում՝ աշխարհիկ ու հոգևոր ավատատերերի նկատմամբ հալածանքների սաստկացումով։ Դեռևս VIII դ. 20-ական թվականներին բնակչությանից գանձվող ծխահարկը փոխարինվեց գլխահարկով։ Բնատնտեսության տիրապետության պայմաններում դրամական հարկային սխտեմի կիրառումը ծայրահեղ աղքատության ու թշվառության հասցրեց երկրի բնակչությանը։ Այդ իրավիճակն արտացոլվել է 768 թ. Պարտավի եկեղեցաժողովի ընդունած ԺԴ կանոնում, որտեղ նշված է. «Որք չեւ հասեալ ի ժողովրդականաց յայն, որ ի նեղութենէ հարկաց անձինքն հասանեն ի վաճառ, եւ սակաւ ինչ ի գոյութեան լինի, եւ

⁷ Ղ. Փարպեցի, էջ 37, հմմտ. С. Туманов, Studies in Christian Caucasian History, Georgetown, 1963, p. 209.

⁸ ՅՅ ՈՎՀԱՆՆՈՒ ՄԱՄԻԿՈՆԵՆԻ ԵՎԻՍԿՈՎՈՍԻ ՊԱՏՄՈՒԹԻՆ ՏԱՐՈՆՈՅ, ՎԵՆԵՏԻԿ, 1832, էջ 13, տես, նաև ՅՅ ՈՎՀԱՆ ՄԱՄԻԿՈՆԵԱՆ, ՊԱՏՄՈՒԹԻՆ ՏԱՐՈՆՈՅ, ԵՐԵՎԱՆ, 1941, էջ 158։

⁹ С. Туманов, նշվ. աշխ., էջ 213։

¹⁰ Ս. Երեմյան, Հայաստանը ըստ Աշխարհացոյցի, Երևան, 1963, էջ 44։

¹¹ «Պատմութիւն Ղեոնդեայ Մեծի վարդապետի Հայոց», Ս. Պետերբուրգ, 1885, էջ 15, հմմտ. Գ. Հովսեփյան, Քարտեզ հայ հնագրության, Վաղարշապատ, 1913, տախտակ 2, հմմտ. նաև Կ. Ա. Օրբել, Избранные труды, Ереван, 1963, стр. 401—404։ Ա. Տեր-Ղևոնդյանը հենվելով VIII դ. ասորի պատմիչ Դիոնիսիոս Տելլ Մահրացուն վերագրված երկի տվյալների վրա, ցույց է տալիս, որ 749—752 թթ. Հայաստանի հարավային մասում և լեռնային Սասունում արաբական տիրապետության դեմ բռնկել էր ապստամբություն։ Նա միաժամանակ նշում է, որ հիշյալ շրջանները գտնվում էին Մամիկոնյանների ազդեցության տակ (Ա. Տեր-Ղևոնդյան, Սասունի 749—752 թվականների անհայտ ապստամբությունը («Պատմա-բանասիրական հանդես», 1971, № 3, էջ 200)։

վաճառեսցէ զեկեղեցի կամ զսպաս սրբութեան կամ ի կարասւոյ կամ յանդաստանաց եկեղեցւոյ՝ նզովեսցի յԱստուծոյ եւ ի մէնջ. եւ զայնպիսին մի՛ ոք կոչեսցէ քրիստոնեայ»¹²:

Հայաստանում Արքայանների օրոք հարկային խիստ քաղաքականութեան անդրադառնում է նաև Ղևոնդը: Նրա վկայությունից տեղեկանում ենք, որ «...յոյժ ծանրացաւ անուր լծոյ հարկապահանջութեան ի վերայ աշխարհիս Հայոց... Կի վախճանեաց զգիւտ արծաթոյ ի յերկրէս, և ամենայն ոք տալով զպաճարանս ընչից իւրեանց՝ ոչ դտանէին զդինս փրկանաց անձին իւրեանց. և շար կտտանօք գելարանօք և կախաղանօք և դառն տանջանօք կեղէին զկեանս մարդկան»¹³:

Սոցիալական նման ճնշման ու շահագործման պայմաններում, բնականաբար, առաջին հերթին ծանրանալու էր շահագործվող դասակարգի վիճակը: Բայց հայ նախարարները ևս կամա թե ակամա «...յաճախէին տալ ընծայս ձիոց շորոց և հանդերձից պատուականաց և զայլ մթերս ոսկւոյ և արծաթոյ, որպէս զի կարասցեն ընու զբերան վիշապին որ յարձակեալ էր ապականել զերկիրս»¹⁴:

Արարներին «ընծաներ» տվող հայ նախարարներն իրենց հերթին սաստկացնում էին հայ աշխատավոր զանգվածների շահագործումը:

Հայաստանում Արքայան խալիֆայության գերիշխանությունը նշանավորվեց նաև հայ նախարարների՝ որպես երկրի ինքնուրույնության պատվարի դեմ մղված պայքարի ուժեղացմամբ: Այդ քաղաքականությունն իր սուր ծայրով ուղղվեց հատկապես Մամիկոնյանների դեմ, որովհետև նրանք արաբական տիրապետության ժամանակաշրջանում հայ ժողովրդի մղած ազատագրական պայքարի ոգեշնչողներն ու կազմակերպիչներն էին: Այդ գործում հաջողության հասնելու համար նրանք հաճախ ապավինում էին Բյուզանդական կայսրությանը, որը արաբների մոտ առաջ էր բերում Մամիկոնյանների նկատմամբ անվստահություն և նրանց երկրի քաղաքական կյանքից մեկուսացնելու ձգտում: Հակառակ Մամիկոնյանների, Բագրատունիներն ավելի շուտ հակվեցին դեպի խալիֆայությունը, քան՝ Բյուզանդիան: Դա նպաստեց Բագրատունիների նկատմամբ արաբների ցուցաբերած վստահության մեծացմանը: Սակայն խալիֆայությունը, ի հակակշիռ Մամիկոնյանների, առաջին պլան մղելով Բագրատունիներին, անշուշտ, նպատակ չունեւր վարձահատույց լինել վերջիններիս՝ իր հանդեպ բոլորող բարյացակամության ու հավատարմության համար: Այստեղ կարևորն այն էր, որ Բագրատունիների միջոցով նա կպայքարեր Մամիկոնյանների ունեցած մեծ ազդեցության դեմ և դրանով կսրեր երկրի ներքին կյանքում մղվող պայքարը, որը կթուլացներ թե՛ մեկ, և թե՛ մյուս նախարարությունը: Այս քաղաքականությունն այնքան հատկանշական էր, որ անգամ 750 թ., երբ խալիֆայության մեջ բռնկված գահակալական կռիվներում Բագրատունիները հանդես եկան Օմայանների հակառակորդների դեմ և թվում էր, որ հաղթանակած Արքայանները հաշվհարդար կտեսնեն նրանց հետ ու ավելի շուտ կգերադասեն Մամիկոնյաններին, Հայաստանում

¹² «Կանոնագիրք Հայոց», հ. Բ, աշխատասիրությամբ Վազգեն Հակոբյանի, Երևան, 1971, էջ 11:

¹³ Ղևոնդ, էջ 135:

¹⁴ Նույն տեղում, էջ 128:

առաջնությունը դարձյալ տրվեց Բագրատունիներին: Այսպես, 753 թ. սկսած, այսինքն՝ Մուշեղ Մամիկոնյանի իշխանությունից հետո, հայոց իշխանի պաշտոնը գերազանցապես սկսեցին զբաղեցնել Բագրատունիները¹⁵:

Հայաստանում խալիֆայության վարած քաղաքականությունը կտրուկ շրջադարձ ապրեց VIII դ. երկրորդ կեսին, երբ իշխանության գլուխ անցան Աբբասյանները: Աբբասյան խալիֆայությունը տնտեսական լուրջ դժվարությունների առաջ կանգնեց, երբ նրանից որոշ երկրներ անկախացան¹⁶: Դրա հետևանքով նվազեցին պետության եկամուտները: Պետությունը մշտապես դրամական կարիքի մեջ էր նոր մայրաքաղաքի՝ Բաղդադի հիմնադրման (762), ինչպես նաև խալիֆաների շուրջ ու ցոփ կենցաղի հետևանքով: Երկրի տնտեսական կյանքում առաջացած այս դժվարություններն Աբբասյանները փորձում էին հաղթահարել իրենց տիրապետության տակ գտնվող ժողովուրդների վրա դրված հարկային լծի սառնակացումով:

Ի տարբերություն նախորդ՝ Օմայան հարստության, որն ամենից առաջ արաբական էր, այսինքն, երկրի քաղաքական կյանքին կարող էր մասնակցել միայն արաբը, Աբբասյան հարստությունը դարձավ համամահմեդական, և առանց ազգային պատկանելությունը հաշվի առնելու այդ իրավունքն արտոնվեց մահմեդականին¹⁷:

Աբբասյան խալիֆայությունը ձգտում էր իր կոսմոպոլիտ պետությունը համախմբել մեկ միություն մեջ՝ հիմնված ընդհանուր հավատի և շահերի վրա:

Հայաստանն արաբների կողմից նվաճվելով հանդերձ՝ պահպանել էր հարաբերական ինքնուրույնությունը և խոչընդոտ էր Աբբասյանների քաղաքական ծրագրի իրականացման ճանապարհին: Ծվ բնական է, որ այն վերացնելու նպատակին պիտի ուղղվեր առաջին հարվածը: Բացի այդ, խալիֆայության համար առանձնահատուկ նշանակություն ունեւր Բյուզանդիային և խազարներին սահմանակից երկրներում ամրություններ ստեղծելն ու այդ կարևոր կետերը արաբական բնակչությանը բնակեցնելը: Դա արվում էր հիմնական թըշնամիների դեմ պայքարելու, ինչպես նաև համապատասխան շրջանների բնակչությանը հնազանդ պահելու նպատակով: Արաբա-բյուզանդական տեղական ռազմական մրցակցության պայմաններում առաջնակարգ նշանակություն ունեին սահմանային ամրությունների այն շղթան ու նրա օժանդակ կետերը, որոնք սկիզբ էին առնում Կիլիկիայից և ձգվում մինչև Եփրատի ակունքները¹⁸: Պաշտպանական այդ գոտին հայտնի է Սուղուր անունով¹⁹: Ամրությունների այս շղթան ու նրա մերձակա կետերը ոչ միայն արևմուտքից էին մոտեցնել Մամիկոնյանների տիրություններին, այլև՝ հարավից: Հարավում ևս, դարձյալ նըշված նպատակներով, Մամիկոնյանների կալվածքներին էր սահմանակցվել

¹⁵ Տե՛ս Ա. Տեր-Ղեոնդյանի կազմած հայոց իշխանների ցուցակը («Պատմա-բանասիրական հանդես», 1964, № 2, էջ 130):

¹⁶ B. Lewis, Abbasids, The Encyclopaedia of Islam, vol. 1, Leiden—London, 1965, p. 18.

¹⁷ P. Hitti, History of the Arabs, London, 1916, p. 289, B. Lewis, նշվ. աշխ., էջ 17, հմտ. Ա. Տեր-Ղեոնդյան, Արաբական ամիրայությունները Բագրատունյաց Հայաստանում, Երևան, 1965, էջ 44:

¹⁸ А. А. Васильев, Византия и арабы, Политические отношения Византии и арабов за время Аморийской династии, СПб., 1900, стр. 78—79.

¹⁹ E. Honigmann, al-Thughur, The Encyclopaedia of Islam, Leyden—London, 1929, Fasciculus K, p. 738—739.

արարեներով բնակեցված Զաղիրա նահանգը: Անդամ նրա առանձին շրջանները կոչվում էին այնտեղ հաստատված ցեղերի անուններով՝ Դիար Ռաբիա, Դիար Մուդար և Դիար Բաքր²⁰: Այդ ցեղերն արաբական նվաճումների հենց սկզբից հաստատվելով այստեղ՝ ընդհուպ մոտեցել էին Տարոնին և Մամիկոնյանների հարավային մյուս տիրույթներին՝ սպառնալով նրանց դոյուքյանը:

Միանգամայն պարզ է, որ Հայաստանի քաղաքական կյանքից մեկուսանալու վտանգը, ինչպես նաև սեփական հողային տիրույթները կորցնելու իրողության գիտակցումը Մամիկոնյաններին մղեց կազմակերպելու և գլխավորելու VIII դ. երկրորդ կեսի ժողովրդական ապստամբությունները, որոնք ուղղված լինելով խալիֆայության դեմ, առաջին հերթին, լայն զանգվածների անսահման կեղեքման, ազգային ու կրոնական դաժան հալածանքների արդյունք էին:

Պատմագրության մեջ փորձ է արվել ցույց տալու, թե իբր արաբական տիրապետության ժամանակաշրջանում Անդրկովկասի ավատատերերի ժառանգական սեփականատիրական իրավունքները զրեթե չեն ոտնահարվել, որ էական տարբերություն է դրվել տեղական արար և ոչ արաբ ավատատերերի հակախալիֆայական ելույթների միջև: Ընդամին, նշվել է, որ եթե առաջինները վճռականորեն պայքարել են խալիֆայության դեմ՝ անկախության հասնելու նպատակով, ապա վերջինները չեն փորձել թոթափել արաբական լուծը, այլ սահմանափակվել են սոսկ արաբ կառավարիչների հարստահարությունների և ապօրինությունների դեմ ուղղված ելույթներով կամ իրենց ենթակա շերտանների կառավարումով: Վերջապես, գտնվելով խալիֆայության տիրապետության օղակում, Անդրկովկասն իբր ղերծ է մնացել «հյուսիսի բարբարոս ցեղերի» ու բյուզանդացիների ասպատակություններից²¹:

Հայտնի է, որ սկզբնական ժամանակաշրջանում արաբական տիրապետությունը Հայաստանում բավական տանելի էր²²: Հայոց եկեղեցին և ավատատերերն օգտվում էին մի շարք արտոնություններից, որոնք վավերացվում էին խալիֆայության և նրանց միջև կնքված տարբեր պայմանագրերով²³: Հետագայում, սակայն, խալիֆայության կողմից Հայաստանում հարկային լծի ծանրացումը, արաբական ցեղերի զանգվածային ներգաղթը, երկրի լավագույն հողերի բռնագրավումը, բնակչության հարկադիր արտագաղթը, նախարարների նկատմամբ դրսևորած հալածանքների և ոչնչացման քաղաքականությունն ակնբախ են դարձնում հայ ժողովրդի բոլոր խավերի նկատմամբ արաբների կիրառած քաղաքականության խստությունը: Դրա հետևանքով էր, որ VIII դ. և հետագայում Հայաստանում բռնկվեցին ապստամբություններ, որոնք, հակառակ արդեն հիշատակված կարծիքի, նպատակ ունեին տապալել արաբա-

²⁰ M. Canard, al-Djazira, The Encyclopaedia of Islam, vol. 2, Leyden—London, 1965, p. 523, նույնի՝ Histoire de la dynastie des Hamdanides de Jazirah et de Syrie, Alger, 1951, p. 75—144.

²¹ П. К. Жузе, Мутагалибы в Закавказье в IX—X вв. («Материалы по истории Грузии и Кавказа», вып. III, Тбилиси, 1937, стр. 184—202).

²² Հ. Մանանդյան, Ժողովրդական ապստամբությունները Հայաստանում արաբական տիրապետության դեմ (Քննական տեսություն հայ ժողովրդի պատմության, հ. Բ, Բ մասի նյութեր, Երևան, 1960, էջ 209, 211):

²³ Ա. Տեր-Ղևոնդյան, Հայ նախարարների հողատիրական իրավունքները 7—9-րդ դդ. ըստ խալիֆայության պայմանագրերի («Պատմա-բանասիրական հանդես», 1974, № 4, էջ 20—34):

կան լուծը: Անդրադառնալով VIII դ. երկու ապստամբություններին, Ղևոնդը, օրինակ, դրում է. «...յայնժամ խորհեցան ամենայն նախարարք աշխարհիս բնկենուզ զլուծ հնազանդութեանն և ապստամբել և ի բաց կալ ի հնազանդութեանն Խամայելի»²⁴, կամ «...լու համարեալ զմահ քաջութեամբ քան զկեանս վտանգատր՝ ձեռնամուխ եղեն յիսա ապստամբութեան, և ի բաց կացին ի հնազանդութեանն Խամայելի»²⁵, Անգամ ապստամբությանը դեմ եղած հայ նախարարների խմբավորումը ոչ թե բացառում էր արաբական տիրապետության տապալման անհրաժեշտությունն ընդհանրապես, այլ ելնում էր ուժերի հարաբերակցությունից, քանի որ, ըստ նրանց, «...նուազունք են զօրքս մեր ի մէջ բռնութեանն Խամայելի, և ոչ կարեմք զդէմ ունել զօրաց նոցա, և ոչ զերկիր մեր հանել ի բերանոյ վիշապացն»²⁶:

Ինչ վերաբերում է արաբների կողմից «Հյուսիսի բարբարոսների հարձակումներից Անդրկովկասի պաշտպանությանը», ապա Անդրկովկասը դարձել էր արաբա-խազարական հակամարտությունների թատերաբեմ²⁷:

Բացի այդ, արաբական տիրապետության օրոք Հայաստանը, և ընդհանրապես Անդրկովկասը, թեև որոշ չափով զերծ մնացին բյուզանդական հարձակումներից, սակայն ենթարկվեցին արաբական ավերիչ ասպատակություններին:

774—775 թթ. ապստամբության ճնշման և հետագա հալածանքների հետևանքով հայկական նախարարական տները խիստ թուլացան, իսկ երկրի ինքնուրույն կյանքին միշտ նախանձախնդիր Մամիկոնյան տոհմի անդամները հարկադրված գաղթեցին Բյուզանդիա կամ Վրաստան²⁸: Նրանց տիրույթները զրկվելով իրենց պաշտպաններից, կանգնեցին արաբներով բնակեցվելու վտանգի առաջ, որովհետև հենց այս ապստամբությունից հետո և մասնավորապես Հարուն ալ-Ռաշիդ խալիֆայի (786—809) օրոք էր, որ արաբական տարրի՝ Հայաստանում, և առհասարակ Անդրկովկասում, հաստատվելը զանգվածային բնույթ կրեց: Օրինակ, Յակուբին հաղորդում է, թե ինչպես Արմինիայի ոստիկան Յուսուֆ իբն Ռաշիդ ալ Սուլամին (786—787) Հայաստան գաղթեցրեց նիղարիների ցեղը, իսկ Եզիդ իբն Մազյադ իբն Զայիգա ալ Շայրանին (787—788) այստեղ բերեց ռաբի ցեղը²⁹: Արաբների ներգաղթը շարունակվեց նաև հետագայում: Հարուն ալ-Ռաշիդի տիրապետությունը թեև դիտվում է Աբբասյան պետության հզորության բարձրակետ³⁰, սակայն հենց այս ժամանակ արդեն երևան եկան նրա թուլացման նախանշանները³¹:

Հիշյալ ժամանակաշրջանում խալիֆայության տիրապետությունը Հայաստանում կայուն չէր: Այդ ամենից առաջ արտահայտվում էր հայ նախարար-

²⁴ Ղևոնդ, էջ 121 (այս և հետագա ընդգծումները մերն են—Գ. Գ.):

²⁵ Նույն տեղում, էջ 138:

²⁶ Նույն տեղում, էջ 122:

²⁷ М. И. А р т а м о н о в, История хазар, Ленинград, 1962, стр. 202—261.

²⁸ Ղևոնդ, էջ 138—139, Cyril Toumanoff, The Mamikonids and the Liparitids, Armeniaca, Mélanges d'études Arméniennes, Ile de Saint Lazare—Venise, 1969, p. 125—137.

²⁹ Մարաբացի մատենագրեր Հայաստանի մասին», հավաքեց և թարգմանեց Բ. Խաթիսյան, Վիեննա, 1919, էջ 111, հմմտ. Յ. Մարկվարտ, Հայ Բագրատունյաց ճյուղաճրոթյունը, Վիեննա, 1913, էջ 36—37:

³⁰ P. Hitti, նշվ. աշխ., էջ 299:

³¹ B. Lewis, նշվ. աշխ., էջ 18:

ների հաճախակի կրկնվող ելույթներով ու խաղարների ասպատակություններով, Բացի այդ, Հայաստանում վերաբնակեցված արաբական ցեղերի առաջնորդները գրավելով հայ ավատատերերի տիրույթները, հակախալիֆայական ընդվզումներով ու կենտրոնախույս ձգտումներով փորձում էին երկրում ամրապնդել սեփական դիրքերը, նրանց հնազանդեցումը կարևոր նշանակություն ուներ խալիֆայության համար³²։

Հակախալիֆայական այս շարժումներից հատկապես հիշարժան է 794 թ. Արու Մուսլիմ ալ-Շարիի խռովությունը, նա անգամ կարողացավ մի քանի ամիս շարունակ պաշարված լիճակում պահել Դվինը³³։

Խալիֆայության դեմ ըմբոստացող ուժերից էին նաև VIII դ. վերջերից Հայաստանում հաստատված Զահհաֆյանները, Օգտվելով խալիֆայության, ինչպես նաև Մամիկոնյանների և մյուս հայ նախարարների թուլությունից, նրանք բոլոր միջոցներով փորձեցին երկրի տիրապետող ուժը դառնալ, նրանց առաջնորդ Զահհաֆն ամուսնանալով Բագրևանդի ճակատամարտում զոհված Մուշեղ Մամիկոնյանի դստեր հետ, տիրել էր Արշարունիք գավառի մի մասին և հավակնում էր ժառանգել Մամիկոնյանների ֆեոդալական մյուս տիրույթները, այսինքն, ինչպես Վարդան պատմիչն է նշում. «Խորհէր տիրել ի ձեռն կնոջն բոլոր աշխարհին»³⁴։ Վարդանի այս վկայությունից մակաբերվել է, թե իբր Զահհաֆն ամուսնանալով Մամիկոնյանի դստեր հետ, տիրեց նրանց տոհմի գրեթե բոլոր կալվածքներին³⁵։ Մինչդեռ պատմիչը հստակ կերպով ասում է, որ Զահհաֆը «խորհէր տիրել» և ոչ թե տիրում էր ու, ինչպես կտեսնենք, իր նպատակին նա չկարողացավ հասնել, քանի որ հանդիպեց Բագրատունիների դիմադրությանը։

Զահհաֆի նմանօրինակ նկրտումը, հարկավ, իրավական որոշ հիմք ուներ, որովհետև Մուշեղ Մամիկոնյանի երկու որդիներն արաբական հալածանքներից խույս տալով և ապահովություն գտնելու նպատակով հաստատվել էին Վասպուրականում՝ Մերուժան Արծրունու մոտ։ Վերջինս, սակայն, սպանել էր նրանց՝ պատճառաբանելով «որպէս թէ ի պատճառս հօր նոցա եղև աղէտն մեծ»³⁶ (նկատի ունի ապստամբության ճնշումը)։ Հետաքրքիր է նաև այն շա-

³² П. К. Ж у з е, նշվ. աշխ., էջ 172—173։

³³ «Արաբացի մատենագրեր Հայաստանի մասին», էջ 111—112։

³⁴ «Մեծին Վարդանայ Բարձրբերդեայ Պատմութիւն Տիեզերական», Մոսկվա, 1861, էջ 105։ Վարդանը թեև այս դեպքերի ականատեսն ու ժամանակակիցը չէ, սակայն նրա երկը մեզ հետաքրքրող որոշ հարցերի առնչությամբ ստույգ ու վստահելի է, որովհետև, ինչպես ենթադրվում է, նրա աղբյուրներից է Եսպուհ Բագրատունին։ Պատմիչի տվյալները, որոնց մի մասը լրացվում են արաբ հեղինակների հաղորդումով, խիստ կարևոր են ու եզակի (Յ. Մարկվարտ, նշվ. աշխ., էջ 33—34, ն. Ադոնց, Պատմական ուսումնասիրություններ, Փարիզ, 1940, էջ 59—63)։

³⁵ J. Laurent, L'Arménie entre Byzance et l'Islam, Paris, 1919. p. 96; Լորանը չնայած մատենադրում է Մ. Բրոսոսի «Collection d'historiens arméniens, t. 1, st. Petersburg, 1874» գրքի XIII էջը, սակայն այնտեղ կարդում ենք. le même Vardan mentionne p. 105, un Ismaélite nommé Dchahap, qui avait épousé une fille du prince Mouchegh Mamikonian, lui ayant apporté en dot une grande partie du canton d'Archarounik, situé au centre de la province d'Ararat. Նույն Վարդանը (էջ 105) հիշատակում է Իսմայելի Զահհաֆ անունով մեկին, որն ամուսնացել էր Մուշեղ Մամիկոնյանի դստեր հետ և որը նրան տրվեց օժիտ տվել էր Արշարունիք գավառի մեծ մասը՝ Այրարատ նահանգի կենտրոնում։

³⁶ Վարդան, էջ 105։

հազարգովածությունը, որը հանդես էր բերում Մամիկոնյան իշխանադուստրը Ջահհաֆի հետ իր ամուսնության խնդրում, քանի որ դրանով կապավիներ նրա ուժին³⁷։ Այս փաստն արդեն աներկրայորեն հաստատում է Մամիկոնյան տոհմի թուլությունն ու քայքայվածությունը³⁸։

Պատմագիտական դրականության մեջ նշվել է, որ 747—750 թթ. հակա-արաբական ապստամբությունից հետո Բագրատունիները Մամիկոնյաններից նվաճեցին Տարոնը, որի Բագրատունյաց առաջին իշխան դարձավ Սահակ Բագրատունին³⁹։ Այնուհետև ցույց է արվել, որ հետագայում հայոց սպարապետ Սմբատ Բագրատունուն հաջողվել է Տարոնից դուրս քշել իր զարմիկներին, որոնք Սահակի ժառանգներն էին, և այնտեղ հաստատել իր եղբորը՝ Վասակ Բագրատունուն⁴⁰։ Այս տեսակետն առաջադրողը թեպետև հենվել է Ղևոնդի տվյալների վրա, սակայն նկատենք, որ նրանում ~~դե~~ ուղղակի և ոչ էլ անուղղակի որևէ փաստ չկա նման եզրակացության հանգելու համար։ Ավելին, պատմիչի վկայությունների քննությամբ առավել հավանական է դառնում այն, որ Տարոնը Բագրատունիներին է անցել ոչ թե 750, այլ 775 թ. հետո։

Ըստ Ղևոնդի, 774—775 թթ. ապստամբության ղեկավար Մուշեղ Մամիկոնյանը «միարանեալ ընդ իւր զոմանս ի նախարարացն Հայոց՝ ի բաց եկաց ի հնազանդութենէ Իսմայելի. և գտեալ զոմանս յորդոցն Իսմայելի ի գաւառի իւրում և ի Թաւն իւրում, որք եկեալ պահանջէին ի նմանէ զարիւնս ոմանց սպանելոց ի տոհմէ իւրեանց՝ խողխողէր զնոսա ի սուր սուսերի իւրոյ։ Եւ իճճն գաղթէր յամրացն Արտագեւոյ հաւնեւոճ տամբ իւրով⁴¹։

Մուշեղ Մամիկոնյանի Արտագերս գալը որքան էլ խիզախ քայլ համարենք և գիտենք որպես մարտահրավեր Դվինում ու Կաբինում հաստատված արաբական կայազորներին, այնուամենայնիվ, այնտեղ հաստատվելով նա նախ ձգտում էր իր ընտանիքի անդամներին ապահովել թշնամու հարձակման վտանգից։ Որտեղի՞ց կարող էր Մուշեղ Մամիկոնյանը գաղթել Արտագերս, կամ Տալքից, կամ էլ Տարոնից։ Նրա սեփական գավառները կարող էին լինել Տալքն ու Տարոնը⁴², քանի որ պատմիչը պարզորոշ նշում է՝ արարները եկել էին նրա գավառը և ձգտում էին իրենց արյունակիցների սպանության համար վրեժխնդիր լինել։ Տալքում, բնականաբար, նա չէր կարող լինել. արաբների դեմ ապստամբություն նախապատրաստող Մուշեղը չէր կարող ապրել Հայաստանի ժայռագույն նահանգում՝ կտրվելով երկրի քաղաքական կյանքից։ Եթե անգամ ընդունենք, թե Մուշեղը Տալքում էր, ապա այն ապահովության հուսալի վայր էր, քանի որ մինչ այդ հայ նախարարներից շատերը խուսափելով արաբական հետապնդումներից, բազմիցս ապաստանել էին այնտեղ։

37 Ուշագրավ է, որ Ն. Ակինյանը Մուշեղի դստեր կատարած այս քայլը նաև դիտում է նրա կողմից իր հայրական կալվածքները Բագրատունիների ոտնձգություններից զերծ պահելու փորձ (Ն. Ակինյան, Մատենադարանի հետազոտություններ, հ. 9, Վիեննա, 1930, էջ 247)։

38 Ն. Ադոնց, Պատմական ուսումնասիրություններ, էջ 51։

39 J. Laurent, նշվ. աշխ., էջ 93։ տե՛ս նաև R. Grousset, Histoire de l'Arménie des origines à 1071, Paris, 1947, p. 321.

40 J. Laurent, նշվ. աշխ., էջ 93։

41 Ղևոնդ, էջ 139։

42 Բաղրևանդում ևս Մամիկոնյաններ կային, սակայն պատմիչի այն հաղորդումից, թե Մուշեղը սկզբում ոչնչացրեց իր գավառի արարներին, ապա՝ Բաղրևանդում եղած հարկահաններին, պարզ է դառնում, որ նրա գավառը և Բաղրևանդը չեն նույնանում (նույն տեղում, էջ 139)։

Հետևաբար, հազիվ թե Մուշեղ Մամիկոնյանը ձգտեր ավելի մոտ լինել արաբներին, այսինքն Տալթից գալով հաստատվել Արտագերսում: Այսքանից հետո առավել հավանական է թվում, որ Մուշեղ Մամիկոնյանն Արտագերս է գաղթել Տարոնից: Եվ եթե 774—775 թթ. ապստամբության ժամանակ այն դեռևս պատկանում էր Մուշեղ Մամիկոնյանին, հետևաբար, մինչ այդ այնտեղ Բագրատունյաց իշխանություն չէր կարող լինել:

Անդրադառնալով այն հայ նախարարներին, որոնք վարանում էին մասնակցել արդեն սկսված ապստամբությանը, Ղեոնդը գրում է. «Զի նախարար տանն Արծրունեաց Համազասպ և եղբարք իւր և զօրք նորին մնացին անդէն ի կողմանս Վասպուրական աշխարհին. և Վասակ որդի Աշոտայ և որք ի տոհմէ Ամառունեացն և Տրունեաց՝ մնացին անդէն, ռմանք յամուրն բերդի ի Դաբինս գետ և ի ծագն Մակուայ, և ոմանք ի ձորն Արագեղտայ ամրացեալք՝ սփռէին շուրջ զգաւառօքն ի պէտս կերակրոց և անդէն դառնային յամուրս իւրեանց»⁴³: Ղեոնդի այս կարևոր վկայությունը մեկ անգամ ևս համոզում է, որ Վասակ Բագրատունին ոչ թե իշխում էր Տարոնում, ինչպես գտնում է Լորանը, այլ Բագրատունիների տոհմական գավառում՝ Կոգովիտի Դարույնքում:

Վերջապես, Մամիկոնյանների կողմից 774—775 թթ. ապստամբությունը ղեկավարելու փաստն ինքնին խոսում է Տարոնը 750 թ. Բագրատունիներին անցած լինելու կարծիքի դեմ: Այդ ելույթն, իրավամբ, դիտվել է իբրև օտար լծի դեմ ուղղված երկրորդ համաժողովրդական և հուժկու ընդվզումը 450—451 թթ. հետո⁴⁴, եթե Մամիկոնյաններն այնքան ուժեղ էին, որ կարողացան կազմակերպել ու ղեկավարել նման ելույթ, հետևաբար նրանց դիրքերը Հայաստանում դեռևս չէին սասանվել ու հազիվ թե նրանք կորցրած լինեին իրենց տիրույթները:

774—775 թթ. ապստամբության հետևանքով Մամիկոնյաններին՝ Հայաստանի քաղաքական կյանքից հեռանալը լայն հնարավորություն էր ստեղծում նրանց մրցակից Բագրատունիների վերելքի համար: Ծիշտ է, նրանք նույնպես մասնակցել էին հակախալիֆայական այդ ընդվզումներին, սակայն կարողացան պահպանել իրենց դոլությունը: Շուտով, Բագրևանդի ճակատամարտից շատ շանցած, այնտեղ զոհված Բագրատունու որդիներ Աշոտը և Շապուհը, որոնց մայրը ապստամբության ղեկավար Սամվել Մամիկոնյանի դուստրն էր, ձեռնամուխ եղան իրենց տիրույթների ընդարձակմանը: Աշոտ Բագրատունու և նրա եղբոր՝ Շապուհի, վաղ շրջանի գործունեությունը թեպետ թաղված է անորոշության մեջ, սակայն պարզ է, որ հենց սկզբից նրանք ցուցաբերեցին մեծ ջանքեր՝ հայկական հողերի միավորման համար: Երկրում գերակշիռ դիրք գրավելու համար մղվող պայքարը, բնական է, լինելու էր համառ ու անզիջում: Այն մղվում էր ոչ միայն առանձին վերացած կամ դեռևս իրենց գոյությունը պահպանած հայկական նախարարական տոհմերի սեփականությունը ժառանգելու, կամ նրանց նկատմամբ առաջնություն ապահովելու համար,

⁴³ Նույն տեղում, էջ 144: Արդյո՞ք այս վկայությունից երևում է, թե Դարույնքը պատկանում էր Համազասպ Արծրունուն, ինչպես կարծում է Լորանը (J. Laurent, նշվ. աշխ., էջ 99): Դարույնքը Բագրատունիների տիրույթն էր մինչև այն ժամանակաշրջանը, երբ Աշոտ Մսակերը Կամսարտկաններից գնեց Արշարունքը («Ս տ ե փ ա ն ո ս ի Տ ա ր ո ն ե ց լ ո յ, Ա ս ո ղ կ ա ն, Պատմութիւն տիեզերական», Ս. Պետերբուրգ, 1885, էջ 106):

⁴⁴ Ղ. Ալիշան, Այրարատ, Վենետիկ, 1890, էջ 525, հմմտ. Ս. Մելիք-Բախշյան, Հայաստանը 7—9-րդ դարերում, Երևան, 1968, էջ 327:

այլև՝ տեղի արաբ ավատատերերի ու խալիֆայության թշնամանքի պայմաններում:

785 թ. ներսեհ Կամսարականի մահվանից հետո Կամսարականները նույնպես լիբրացան Հայաստանի քաղաքական կյանքից: Աշոտ Բագրատունին ռազմապետի արար զգալուն Արշարունից, յազգէն Կամսարականաց և զարքունիսն ի Կոգովտէ յԱրշարունիս փոխեաց⁴⁵: Տիրելով Արշարունիքի մի մասին, նա անմիջականորեն կանգնեց Ջահհաֆի դեմ պայքարելու ուղու վրա, որովհետև, ինչպես արդեն տեսանք, վերջինս տիրում էր այդ գավառի մյուս մասին: Աշոտի և Շապուհի համատեղ գործողությամբ Ջահհաֆը դուրս քշվեց Արշարունիքից, նրանք գրավեցին Տայքը, Շիրակը և Աշոցքը⁴⁶:

Աշոտ Մսակերի ջանքերով Գնունիները զերծ մնացին արաբների հետագա հալածանքներից՝ Աղիովիտից գաղթելով Տայք⁴⁷: Նա չէր կարող ուշադրություն չդարձնել Տարոնին տիրելու վրա, քանի որ դրանով հնարավորություն կստանար կասեցնել արաբների ներգաղթը դեպի Հայաստանի իր գրաված շրջանները: Տարոնի ձեռքբերումով Բագրատունիների օրավուր աճող ազդեցությունը կտարածվեր նրա հարևան շրջանների վրա, իսկ քաղաքական նպատակով իրադրության դեպքում՝ կերաշխավորներ նրանց ակտիվ պայքարը արաբական զանգվածի դեմ: Վերջապես, Աշոտ Բագրատունին Տարոնը կարող էր դիտել որպես ժառանգական կալվածք, քանի որ նրա մայրը, ինչպես արդեն տեսանք, Մամիկոնյան էր:

Ե՛րբ կարող էր Աշոտ Բագրատունին գրաված լինել Տարոնը: Այս անցքերի միակ աղբյուրը՝ Վարդան պատմիչը, դժբախտաբար, չի հայտնում այդ թվականը: Մարկվարտը ենթադրում է, որ Տարոնը պետք է Ջահհաֆյանների դեմ մղած պայքարի շնորհիվ Աշոտ Բագրատունուն անցած լինե՞ր 820-ական թվականներին⁴⁸: Ուրեմն, Մարկվարտի, ինչպես նաև Լորանի կարծիքով, Տարոնը պատկանել է նախ Մամիկոնյաններին, այնուհետև՝ Ջահհաֆյաններին և 820-ական թվականներին անցել Աշոտ Մսակերին⁴⁹: Աղբյուրների վկայությունները, սակայն, չեն հաստատում Տարոնը Ջահհաֆյաններին անցած լինելու փաստը:

Ջահհաֆի որդին՝ Աբդ ալ Մալիքը 813 թ. կարճ ժամանակով Արմինիայի ոստիկան դարձավ⁵⁰: Շուտով, սակայն, նա պաշտոնազրկվեց և ապստամբեց խալիֆայության դեմ ու ներման արժանանալով՝ հաստատվեց Դվինում: Այստեղ իր ուժերը համախմբելով, մոտավորապես հինգ հազարանոց բանակով նա փորձեց գրավել Տարոնը: Աշոտ Մսակերը վաղօրոք տեղեկանալով Աբդ ալ Մալիքի նպատակին, նախահարձակ եղավ և հինգ հարյուրանոց ուժերով նրան հտ մղեց: Դրանից հետո Դվինի վրա շարժվեց Շապուհ Բագրատունին: Աբդ ալ Մալիքի վիճակը բավական ծանրացավ: Քաղաքի բնակչությունը ղրժ-

⁴⁵ Ա ս ո ղ ի կ, էջ 106:

⁴⁶ Վ ա Ր դ ա ն, էջ 106:

⁴⁷ Նույն տեղում:

⁴⁸ J. Markwart, Südarmenien und die Tigrisquellen, Wien, 1930, S. 294. հմտ. ն ու յ ն ի՝ Հայ Բագրատունյաց ճյուղազրույթությունը, էջ 106:

⁴⁹ J. Laurent, սյդ. աշխ., էջ 102, ծան. 2: Ըստ նրա Վասակ Բագրատունուց հետո Տարոնում հաստատվել էր Ջահհաֆը:

⁵⁰ «Արաբացի մատենագրեր Հայաստանի մասին», էջ 115, հմտ. նաև Հ. Նալբանդյան, Արաբացի ոստիկանները Հայաստանում, ՀՍՍՀ ԳԱ «Տեղեկագիր», 1956, № 8, էջ 118, Тизенгаузен, Монеты Восточного халифата, СПб, 1873, стр. 180.

գոհելով նրա շահատակություններից, ապստամբեց և սպանեց նրան⁵¹, Այս դեպքերը տեղի են ունեցել մինչև 820 թ., բայց ոչ 820-ական թվականներին, քանի որ այդ ժամանակ Հայաստանում հանդես էր եկել մեկ այլ Ջահաֆյան՝ Սևադան⁵², հոսսելով Աբդ ալ Մալիքի՝ Տարոնը գրավելու փորձի մասին, Վարդան պատմիչը նշում է. «Բայց տունն Ջահասպայ զօրացեալ ի Դուին իբրև հինգ հազարաւ կամեցաւ գնալ ի Տարոն յիշխանութիւն Աշոտի՝ որդւոյ Սմբատայ»⁵³, Ուրեմն, 820 թ. առաջ արդեն Աշոտ Բագրատունին գրաված պետք է լիներ Տարոնը։ Ամենայն հավանականությամբ Տարոնը Բագրատունիներին է անցել VIII դ. վերջերին կամ IX դ. սկզբներին, բայց ոչ ուշ, քան մինչև 806 թ., երբ Աշոտ Մսակերը խալիֆայության կողմից ճանաչվեց որպես հայոց իշխան։

Աշոտ Մսակերի մահվանից հետո՝ 826 թ. նրա իշխանությունը բաժանվեց որդիների միջև։ Տարոնում սկսեց տիրել Բագարատ Բագրատունին, որը հիմք դրեց Տարոնի Բագրատունիների իշխանությանը։ Վերջինիս կարևորությունը հայ ժողովրդի պատմության մեջ ակնհայտ է։

ПОЛИТИЧЕСКОЕ ПОЛОЖЕНИЕ ТАРОНА В VIII ВЕКЕ

Г. С. ГРИГОРЯН

Резюме

История области Тарон занимает значительное место в истории армянского народа.

В ответ на усиление ига Арабского халифата в 70-х гг. VIII в. развернулось народно-освободительное восстание, возглавляемое Мамиконидами. В результате подавления восстания и дальнейших преследований Мамикониды были вынуждены отдалиться от политической жизни Армении. В конце VIII и начале IX вв. борьба Багратидов с арабским Джаафидами с целью присвоения владений Мамиконидов завершилась победой Багратидов.

После смерти отца сын Ашота Мсакера Багарат Багратуни в первой половине IX в. основал Таронское княжество Багратидов.

⁵¹ Վարդան, էջ 107.

⁵² Հ. Նալբանդյան, նշվ. աշխ., էջ 118, հմմտ. Մովսես Կաղանկատվացի, Պատմություն Աղվանից աշխարհի, Երևան, 1969, էջ 255.

⁵³ Վարդան, էջ 107.